

## ”Peerâviehâväöldi iä paijeed savâstâlmáid sâmissiärvâduvvâst”

**Sâmisoster-seervi saavâjodetteijee Ristenrauna Magga arvâl, ete uccâ siärvâduvvâst sáttá lede uáli vaigâd uuccâđ iše, jis killáá peerâviehâväöldist.**



Sâmisoster-seervi saavâjodetteijee Ristenrauna Magga muštâl, ete tavemuin kielâin lii vaigâd vyelgiđ uuccâđ iše, jis killáá peerâviehâväöldist teikkâ seksuaallii illáástmist. Govva: Vesa Toppari / Yle

Ulmuuh, kiäh killájah peerâviehâväöldist, iä ain tuostâ vyelgiđ uuccâđ iše, uáivild Sámisoster-seervi saavâjodetteijee Ristenrauna Magga.

– Sij láá äärgih vyelgiđ toohâđ almottâs poolisân. Tot lii taggaar äšši mast láá maŋgâ pele. Ulmuuh tarbâseh iše, mut iä tuostâ väldiđ iše vuástá, sun muštâl.

### **Viärdásâštoimâ lii máhđuttem tavemuin kieldâin**

Magga muštâl, ete eromâšávt talle ko koččâmušâst lii uccâ päikkikodde, te peerâviehâväöldist lii ain vaigâdub vyelgiđ savâstállâđ.

– Olmooš pala, ete kiinii kulá talle tast. Meid viárdásáštooimâ lii máhđuttem uázžud tääbbin tain tavemuin kieldâin, veikkâ tárbu lii styeres. Toos kolgâččij hutkáđ ereslágán vuovijd ko moh tääl láá.

Magga uáiná meid ete tave-eennâmlâš ohtsášpargo sátáččij leđe šiev vyehi pyerediđ tile.

– Uáináččim kale sâmesiärváduvvâst, ete ep porgâččii jieškote-uv staatâst, peic mist ličij nanosub taat ovtâspargo.

### **“Ij tot lah ton heppâd kote lii huškottâttâm”**

Magga muštâl, ete ulmuuh iä oro tietimin meendu pyereest kost iše puáhtá koijâdiđ. Ovdâmerkkân Inarinlainen-loostâst lii Rikosuhrekocceem almottâs jyehi ohhoost puoh seervij almottâsâi juávhust.

Magga arvâl, ete eenâb-uv kolgâččij tiedettiđ tast maht uuccâđ iše, mut ton lasseen kolgâččij vala pajediđ savâstâlmáid tom, ete ulmuuh uázžuh uuccâđ iše.

– Ij tot lah ton heppâd kote lii huškottâttâm já kii lii tot killájeijee. Tom ij taarbâš hepânâššâd ete nuuvt lii keevvâm, ete ucâliđ peri ruokkáđávt iše, sun aavžut.

Magga suogârdâl, ete äšši ij lah nube tááhust ain meendu oovtkiärdán.

– Nubbe peeli lii tot, ete sun ferttee eelliđ taan siärváduvvâst já ton perrust ton maŋa-uv. Tágárijd aašijd iä pajeed savâstâlmáid sâmesiärváduvvâst. Tot lii ohtâ taggaar syelligâsvuotâ, sun iätá.



- [Eljas Niskanen](#) Yle